

**Thursday, December 11, 2025**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**CRIME VICTIM COMPENSATION**

Aizawl District Legal Services Authority (ADLSA) chuan nimin khan District Judge Meeting Room, District Court, Aizawl-ah pawihawihna tuartu mi 12 hnenah zangnadawmna an hlan.

Crime Victim Compensation semna inkhawm tawi hi Justice Marli Vankung, Gauhati High Court Judge leh Chairman, High Court Legal Services Committee chuan hmanpuiin mi pawikhawihna avanga zangnadawmna inhlanna hun hman a ngai thin chu pawihawihna a tih thu a sawi a. Zangnadawmna chu a dawngtute'n nunphung pangngai an zawh leh theih nan leh intun nun nana dik taka hmang tur in a chah a ni.

He hun-ah hian Mi kut tawrh avanga thi leh kumtling lo pawngsual tawk mi 12 hnenah zangnadawmna Rs 52,80,000/- sem chhuah a ni.

Aizawl District Legal Services Authority (ADLSA)-chuan zangnadawmna dawng thei nia inhria te chuan ADLSA pisa, Aizawl District Court-a Room No. 419-ah zawhfiah theih reng a nih thu a sawi bawk.



**LADC CONGRESS**

Lai District Congress Committee chuan nizan khan Lai District MNF Headquarters, Lawngtlai President hnenah lehkhaw thawnin, LADC a an thawhdunna chu an tihtawp thu an hrilh.

An lehkhaw thawnah hian Lai District Congress Committee chuan, LADC inthlan hmaa thawh hona thuthlung an siam chu inthlan zawh hnuah pawh thawk ho zel tura an inngaih laiin, an beisei leh rin loh taka an thawh hona tichhe thei zawnga hmalakna a awm avangin Lai District Congress Committee chuan a ngai thu tak hle an ti a, hetiang a lo nih takah chuan an hma lam zelah pawh Congress Party tan thil hlauhthawnawm tak a nih avangin, tuna tan chuan an thawh hona chu Lai DCC Political Affairs Committee Meeting chuan tih tawp ni se tih an rel bakah an thawh hona chu an titawp tih an hriattir a ni.

Lai District Congress Committee-in MNF nen an thawh hona an tih tawp chhan an sawi ah MNF Party hotu thenkhatten ZPM Legislature Party member pakhat hnenah House Leader (CEM) ni turin a lo sawm avang leh Bungtlang South Congress Block hotu pakhat hnenah Congress MDC ni lai chu lo thlem chhuaka MNF Party zawm tura hmala tura a lo hrilh vang a ni tih an sawi a ni.



## GOVERNOR

Mizoram Governor General (Rtd.) Vijay Kumar Singh leh Lady Governor Pi Bharti Singh te chuan nizan khan 'Mizoram Creators' Fest 2025' kharna hun, Aijal Club Park-a neih chu an hmanpui.

Governor Vijay Kumar Singh chuan, Digital creator kalkhawmte chu Mizoram state mawi tak leh hnam ziarangte khawvel hmuh theiha pho langa auchhuahpuitu 'cultural ambassador' an nih thu a sawi a. Khawvel thiamna leh hmasawna inher danglam chak tak karah thil thar thiam zung zung duha insiamrem thin thalai, thil danglam bik ngaihtuah chhuaktute'n digital community ni thei tura rahbi pawimawh tak an siam chu lawmawm a tih thu a sawi bawk.

Mizoram Governor chuan social media chu hmanraw chak tak a nih tawh thu leh, mimal tinte'n an dinhmun leh thiamnate pho chhuah nan zalên taka an hman mek thu sawiin, digital creator kalkhawmte chu midangte ngaihdan siam saktu, thalaite thununtu leh khawtlanga thil inlumlet dan chena thunun thei an nih avangin an thiamnate a tha lam hawia hmanga, dan zawm chung leh mawhphurhnate tha taka hlen chung a hmang turin a chah a. Social media chu inpumkhatna, thu dik chauh thehdarhna, midangte rilru a tha lam hawia hruaina leh talent tihpun nana hman a tul thu a sawi a. Digital khawvelah engpawh thleng thei a nih avangin chetsual loh nana fimkhur a tul thu leh a him thei ang bera social media hman a tul thu a sawi bawk.

He Fest-ah hian Mizoram mai bakah State pawn atangtein YouTuber, Influencer leh Social Media Personality-te tel a, Company lar leh hriat hlawh tak takte'n an hmanraw neihte chhawp chhuakin training an buatsaih bawk a ni.

Governor General (Dr) Vijay Kumar Singh leh Lady Governor Pi Bharti Singh te chuan programme zawhah hian Mizoram Creators' Fest puala stall buatsaihte fangin a nghaktute an kawm a ni.



## RUIHHLO DO

Kum 2025-2027 chhunga YMA kumpuan “ Ruihhlo Do” chu nizan khan Vanapa Hall-ah Central YMA President Pu. R. Lalngheta'n a hawng.

Pu R. Lalngheta chuan, khawlai a an unau thle mai mai riahna tur tha nei lo te, CYMA kumpuan ten hma la tanin TBCC-ah dah thlak tan leh a ni ang, a ti. Ruihhlo do chu a sawt tih a takin an hria a, Pafa in be thei tawh lo te, in ngai tak a an han awm ho leh te hmuh chuan a hlawhtlin zia an hmu niin a sawi a. Ruihhlo ngai te diriam lo in, an tan a tha turin YMA hruaitute, ruihhlo ngaite chhanchhuak turin puanven sawi chhing turin mipui a sawm.

CYMA President chuan fimkhur tak leh dik taka Ruihhlo do tlan a ngai tih sawiin, dan chung a leng an ni lo tih erawh hriat thar a ngai a ti a, dik tak leh huai takin Ruihhlo i do ang u, a ti. Ruihhlo an do hian an thawk thlawn lo a, a la ti ve lo ten an tih loh nan, inzirtirna tam zawk neih a ngai tih sawi bawkin, ruihhlo zuarte chuan mi chhungkua nasa takin an tibuai a. Tun atang chuan an ruihhlo zawrh lo sim tur leh eizawna dang lo ngaihtuah tur in a chah a ni.

He hunah hian Central YMA chuan ruihhlo ngaite enkawlina neitu, Operation Kingdom Ministry (OKM) dintu Pi Lalruatpuii leh Tawngtai Bethel Camping Centre (TBCC) hotu Pu TT Zohmingthanga te hnenah chawimawina Thuziak an hlan.

Kumpuan hawnna hunah hian Aizawl khawpui chhunga YMA Branch 112 aiawh mi 6 theuh an tel a ni.



## **PMUY**

Sorkar laipui hmalaknaa a thlawna Gas connection pek chhuahna Pradhan Mantri Ujjwala Yojana (PMUY) hnuaiah Mizoram pumah Gas connection sing 36,031 pek chhuah a ni tawh.

He thu hi nimina Supply Minister Pu B. Lalchhanzova'n a pisa-a thuthar thehdarhtute a kawmnaah sawiin, PMUY hnuaia a thlawna gas connection hi chhungkaw harsa gas connection nei lo thla khata cheng sing 1 lalut tling lote tan dil theih niin, hmeichhia kum 18 tling tawh chhungkaw member zing a mi in a dil thei a, Gas Connection la nei lote chuan nakkum 2026 January ni 31 aia tlai lovah bialtu Distributor hnenah emaw online (PMUY : New Ujjwala 2.0 Connection)-ah an dil thei a ti a, PMUY hi state quota bipk awm lo niin, tun dinhmunah Mizoram a PMUY connection awm chu sing 3, 6,031 chauh a la ni a, hei hi Sawrkar chuan a ngaipawimawh hle tih sawiin, thingtlang Distributor thenkhat la nei tlem te chu nei tam tura tan la turin an hriattir tih a sawi a ni.

Supply Minister chuan kuminah kawngchhia avangin LPG duh ang a thleng tha lo tih sawiin, Vairengte leh Sairang inkar kawngin ziaawm lam a pan chhoh tak avangin IOCL lam pawhin Mizoram a Gas tih thlen kawngah harsatna an nei tawh lo tih an sawi thu a sawi bawk a ni.

